

**ORDE do 26 de marzo de 2019 pola que se establecen as bases reguladoras do programa Emprega Xuventude de incentivos á contratación e formación de persoas mozas, e se procede á súa convocatoria para o ano 2019. Consellería de Economía, Emprego e Industria. DOG N° 69, 9/04/2019**

**Obxecto, finalidade e principios de xestión**

1. Esta orde ten por obxecto fixar as bases reguladoras polas cales se rexerá, en réxime de concorrencia non competitiva e no ámbito da Comunidade Autónoma de Galicia, a convocatoria das subvencións establecidas pola Consellería de Economía, Emprego e Industria para o ano 2019, coa finalidade de **facilitar a inserción laboral das persoas mozas menores de 30 anos** desempregadas que presentan desvantaxes e dificultades particulares para permanecer no mercado de traballo, e favorecer o emprego estable e facilitar a empregabilidade e ocupabilidade.

2. Por medio desta convocatoria as empresas terán a posibilidade de obter axudas para a contratación indefinida inicial, a contratación temporal cunha duración inicial mínima de 12 meses e formación por conta allea (procedemento TR349T).

Inclúense dous tipos de axuda compatibles:

a) Bono de contratación, por medio do cal se proporcionará unha subvención para a contratación indefinida inicial e a temporal cunha duración mínima inicial de doce meses das persoas desempregadas mozas menores de 30 anos.

b) Bono de formación (opcional) dirixido ás persoas contratadas por medio desta orde, para levar a cabo accións formativas que melloren os seus coñecementos e habilidades relacionados co posto de traballo.

**Entidades beneficiarias**

1. Poderán ser entidades beneficiarias dos incentivos previstos nesta orde **as persoas empregadoras e as empresas, calquera que sexa a forma xurídica** que adopten, incluídas as persoas autónomas, as sociedades civís e as comunidades de bens, aínda que carezan de personalidade xurídica, que contraten traballadoras ou traballadores por conta allea para prestaren servizos en centros de traballo radicados na Comunidade Autónoma de Galicia, de acordo cos requisitos e condicións que se establecen nesta orde.

**BONO DE CONTRATACIÓN PARA INCENTIVAR Á CONTRATACIÓN INDEFINIDA INICIAL E A TEMPORAL INICIAL CUNHA DURACIÓN MÍNIMA DE DOCE MESES DE PERSOAS MOZAS**

**Ámbito de aplicación e contratacións subvencionables**

Os incentivos previstos neste programa serán de aplicación ás **contratacións indefinidas iniciais e ás temporais cunha duración inicial mínima de doce meses** que se celebren desde o 1 de outubro de 2018 ata o 30 de setembro de 2019 con persoas desempregadas menores de 30 anos.

Tanto a contratación indefinida inicial como a temporal cunha duración mínima inicial de doce meses, para poder ser subvencionada, deberá ser a tempo completo, incluída a modalidade de fixo discontinuo.

## Requisitos

1. A persoa desempregada pola que se solicita a subvención á contratación ten que cumprir os seguintes requisitos:

a) **Ser menor de 30 anos.**

b) Estar en **situación de desemprego** no momento do inicio da relación laboral.

2. Como consecuencia da contratación indefinida inicial pola que se solicita subvención ten que **incrementarse o cadro de persoal fixo e neto da empresa**, no ámbito territorial de Galicia, respecto aos tres meses anteriores ao mes de realización da contratación pola que se solicita subvención.

3. Os incentivos previstos neste procedemento serán de aplicación a **todas as modalidades contractuais de carácter temporal a tempo completo** que se realicen con persoas mozas (engadir contrato formación e aprendizaxe).

Os **contratos temporais** terán unha duración mínima inicial de **12 meses**.

Como consecuencia da contratación temporal que se fomenta ten que **incrementarse o emprego neto da empresa** no ámbito territorial de Galicia respecto aos tres meses anteriores ao mes da contratación.

## Contías dos incentivos

1. Para as contratacións indefinidas iniciais realizadas ao abeiro desta orde de convocatoria **incentivaranse cunha axuda de 6.000 euros por cada persoa desempregada menor de 30 anos** contratada que cumpra os requisitos mencionados no artigo 21.

No caso de contratacións na modalidade de fixos-descontinuos a contía do incentivo será proporcional ao tempo de traballo.

2. Para as **contratacións temporais cunha duración mínima inicial de doce meses** realizadas ao abeiro desta orde de convocatoria **incentivaranse cunha axuda de 3.000 euros por cada persoa desempregada menor de 30 anos** que cumpra os requisitos mencionados no artigo 21.

3. As contías establecidas nos puntos 1 e 2 **incrementaranse nun 25 % nos** seguintes casos, que son acumulables entre si:

– Se é unha empresa con máis de 50 persoas traballadoras e cunha taxa de estabilidade igual ou superior ao 70 %.

– Se a actividade da entidade solicitante pertence ao ámbito de sectores estratéxicos.

Aplicarase a subvención polos incrementos indicados pola persoa ou entidade solicitante; en caso de non exercer a opción, entenderase solicitada pola contía superior que quede acreditada coa documentación achegada coa solicitude.



## **PROGRAMA DE BONOS DE FORMACIÓN. PROGRAMA DE FINANCIAMENTO DE ACCIÓNS FORMATIVAS NO CENTRO DE TRABALLO**

### **Accións subvencionables e requisitos**

1. As empresas que así o soliciten poderán ser beneficiarias dun bono para a formación das **persoas traballadoras** subvencionadas por medio do programa de bono de contratación previsto nesta orde. Para isto teñen que cumprir os seguintes requisitos:

a) A persoa traballadora que recibe a formación e titorización ten que ser a mesma que participa no programa de bonos de contratación e, polo tanto, cumprir os mesmos requisitos que se establecen para participar no capítulo II.

b) En canto a duración da **acción formativa será dun mínimo de 70 horas no caso dos contratos indefinidos iniciais e dunha duración mínima de 50 horas no caso dos contratos temporais**, de formación teórica en contidos relacionados co posto de traballo a que asista integramente a persoa traballadora que participa neste programa.

c) Exclúese deste tipo de axuda a formación nas modalidades de teleformación e a distancia.

d) A acción formativa terá lugar dentro dos tres primeiros meses desde o inicio do contrato e deberá estar finalizada o 30 de novembro de 2019.

e) Para as contratacións realizadas entre o 1 de outubro de 2018 e a data de publicación desta orde a acción formativa levarase a cabo no prazo de tres meses contados desde o día seguinte ao da súa publicación.

2. Queda excluída deste bono de formación aquela que supoña o cumprimento de obrigas legais empresariais en materia preventiva a que fai referencia o artigo 19 da Lei 31/1995, do 8 de novembro, de prevención de riscos laborais.

### **Lugar de impartición das accións formativas**

As entidades beneficiarias desenvolverán as accións formativas a través de medios propios ou por medio da súa contratación, podendo realizalas tanto nas súas instalacións como nas da entidade encargada da súa formación.

### **Contías dos incentivos e condicións da percepción**

Esta formación incentivarase, no caso das contratacións indefinidas iniciais cunha axuda de **4.000 euros por cada persoa traballadora dada de alta nun contrato indefinido e de 2.000 euros por cada persoa contratada por medio dun contrato temporal inicial de doce meses** e que en ambos os dous casos cumpran os requisitos establecidos na presente orde.

### **Prazo de presentación**

1.-As solicitudes de axudas polas contratacións por conta allea subvencionables realizadas entre o 1 de outubro de 2018 e a data da publicación desta orde deberán presentarse no prazo de dous meses contados desde o día seguinte ao da publicación (9 xuño 2019).

2.-As axudas previstas polas contratacións subvencionables realizadas desde a entrada en vigor desta orde deberán solicitarse ata o **último día do segundo mes seguinte á data en que se inicie**

a **relación laboral indefinida ou temporal** pola que se solicita subvención. Se o último día de prazo fose inhábil entenderase prorrogado ao primeiro día hábil seguinte.

3. O prazo para a presentación das solicitudes de axudas rematará **o 30 de setembro de 2019**, aínda que nesa data non transcorrese o prazo sinalado nos parágrafos anteriores.